

四庫全書

子部

欽定四庫全書

子部
居業錄卷八

詳校官中書臣金應琦

侍讀臣孫球覆勘

覆校官中書臣宋鎔

校對官中書臣吳俊

謄錄監生臣董邦本

欽定四庫全書

居業錄卷八

明 胡居仁 撰

經傳第八

大學言明德新民明德自明其德也新民推以及民使之自新也故曰先知覺後知自老子有愚民之說秦愚黔首後世一向只是欲愚其民無有能新其民者聖人新民是欲使民明其德至老氏愚其民欲昏其德也蓋恐其智巧奸偽而難治至秦愚黔首是欲其蠢

然無知以聽從於已可以肆其暴令之暴虐不仁者
皆欲愚其民

義理貫通後此心便有定主不可惑亂故曰知止而后
有定

理在物上故須格物方窮得理釋氏遺物是懸空求理
故只見差去

致知在格物從事物上窮究其理便實若只管思索想
像便是思而不學則殆

人多因不知而敗事故大學先致知知至而不能處事者鮮矣

或問存養在致知之先在致知之後曰未知之前非存養則心昏亂義理之本源已喪何以能致知既知之後非存養則亦放逸偷惰天理隨失何以保其知先儒言未知之前非敬無以知既知之後非敬無以守又曰敬者聖學之所以成始成終者也又問存養屬知屬行曰存養乃知之本行之事此未行之行也

金匱要略卷八
心本有知因氣稟物欲昏蔽其良知故須致知

顧諟天之明命是事事不違天理顏子非禮勿視聽言動孟子必有事焉是此等工夫

顧諟天之明命是操存省察要事事盡理使天賦之理不至昏失豈日常看見光光明明乎然則參前倚衡是何物曰此指忠信篤敬而言是人做工夫處常不離乎忠信篤敬則此心常存天之明命無不在矣

自新為新民之本未有自新而不能新民者亦未有不

自新而能新民者

半上落下人難做半夾界事難做故君子無所不用其極

為治須要有本末德具於己人自感化此本也修政立事處置得宜末也本正則末易施末脩則本益厚然末出于本非兩事也

曉得道理怕人不實去做故大學致知後便要誠意要
做不做此是意不誠是自欺處

意者心有專主之謂大學解以為心之所發恐未然蓋
心之發情也惟朱子訓蒙詩言意乃情專所主時為
近

窮理后便有才誠意后便有德

心廣體胖誠意之效是天理實有諸中也

宰相以不蔽賢不忌功為賢故曰其心休休焉

在心無一毫不盡是忠發出在事上無不實便是信利
極害亦至故石崇滅身亡家

私於己者必害於己與衆同利者利莫大焉

古者義利只是一體事義所以為利利即義之所為也
故曰以義為利又曰利者義之和也又曰利物足以
和義蓋以義制事自然順利修於己也心廣體胖推
於人也民安物阜利孰大焉如公劉遷邠文王治岐
上下莫不殷富曾子曰生財有大道孟子亦曰善政
得民財蓋分田制井恭儉節用自然上下豐足皆以
義為利亦非將義去求利只是義則無不利也以家

言之父慈子孝兄弟恭夫義婦順利孰大焉

自小學大學之教不行高者入空虛卑者入功利

自大學格物致知之教不行學者所見淺陋

小學是做敬的事敬是大學骨子若無敬一部大學做不成

在天曰命在人曰性在物曰理在五常為道其實非有二也然道又通乎天地人而言故曰天道地道人道只是這箇道理更有甚事聖賢隨其所指分別出來貫

通後萬物只一理以其流行不息賦與萬物者謂之
命萬物各有稟受而此理無不全具謂之性性中生
意粹然為衆善之長謂之仁裁度斷制處得其宜乃
性之義儀章品節天秩燦然不亂乃性中之禮分別
是非條理分明乃性中之智實有此理元無虛假謂
之信見于日用各有所當行者謂之道通天地人物
莫不各有當然之理總謂之道其所以闡闢天地終
始萬物無窮無盡謂之太極無非是這道理

道一也所指不同孔子曰一陰一陽之謂道邵子以道
為天地之本又以道為太極朱子曰元亨利貞天道
之常子思曰率性之謂道然道即理也一陰一陽之
謂道形而上者謂之道是指此理行於形氣之中也
道為太極為天地之本是指此理為造化之主也率
性之謂道是指此理見于人身日用也元亨利貞是
指天理之流行而言也

工夫本原只在主敬存心上致知力行皆靠住這裡做

去道理本原只在天命之謂性上萬事萬物之理皆
在此處流出

語類云忠是就臣所不足處言之此記者之誤蓋忠是
臣職當為性分固有若因其不足而聖人設此以救
之則是聖人作意安排非率性之謂矣

戰戰兢兢是不敢有些子放肆戒謹恐懼是不敢有些
子惰慢

人常戒謹恐懼則物欲自來不得所以存得天理之本

然在

古人無時無處不用力無事之時必戒謹恐懼有事之時必精察其是非

未發之時事物之理已具但未發耳此時不容求索只敬以自持事物既接思慮一動則便是已發便當省察然其已發之理便是未發時的理體用本末實一貫

涵養得這道理發便中節

人之學易差羅仲素李延平教學者靜坐中看喜怒哀
樂未發以前氣象此便差却既是未發如何看得只
存養便是昔呂與叔蘇李明求中于喜怒哀樂未發
之前程子非之朱子以為即已發之際而識其未發
之前者則可愚謂若求未發之中看未發氣象則動
靜乖違反致理勢危急無從容涵養意味故古人于
靜時只下箇操存涵養字便是靜中工夫思索省察
是動上工夫然動靜二端時節界限甚明工夫所施

各有所當不可乖亂混雜所謂動靜不失其時其道
光明今世又有一等學問言靜中不可着箇操字若
操時又不是靜以何思何慮為主悉屏思慮以為靜
中工夫只是如此所以流于老佛不知操字是持守
之意即靜時敬也若無箇操字是中無主悠悠茫茫
無所歸着若不外馳定入空無此學所以易差也
道理本全具未發時敬以養之莫令有偏也已發時敬
以察之莫令有差內外動靜交致其功

黃勉齋言性雖為氣質所雜然其未發也此心湛然物欲不生氣雖偏而理自正以釋子思未發之中又引朱子未發之前氣不用事為證竊恐誤也夫偏濁之人未發之前已失其中故已發不能和故子思教人致中和先儒以存養為致中省察為致和不善之人亦有靜時然那時物欲固未動然氣已昏心已偏倚理已塞本體已虧故做未發以前工夫須是主敬子思言戒謹恐懼程子言莊整齊肅朱子言端莊靜一

天人各盡其分而理則自相貫通至天地位萬物育人又做着天三才備而交相為功也

今人學不曾到貫通處却言天地萬物本吾一體畧窺見本原就將橫豎放胸中再不去下格物工夫此皆是助長反與理二不若只居敬窮理盡得吾之當為則天地萬物之理即在此蓋此理本無二若將天地萬物之理懷放胸中則是安排想像愈不能與道為一如釋氏行住坐卧無不在道愈與道離也

中庸可以盡易之理

易是君子而時中之道

隨時不是隨俗令人錯認以隨俗為隨時古人皆因那時節便做那時事無不當其可如堯舜當那時便揖讓湯武當那時便征伐孔子當周末又傳道垂訓皆隨時非隨俗也

泥古則濶于事情徇俗則偏于苟簡二者皆非天理時中

程子體道最切如說鳶飛魚躍是見得天地之間無非此理發見充塞若只將此意思想像收放胸中以為無適而非道則流于狂妄反與道二矣故引必有事焉而勿正心勿忘勿助長則吾心常存不容想像安排而道理流行無間矣故同以活潑潑地言之以見天地人物之理本相通但吾不可以私意撓之也夫婦人倫之首王敬之端人事之至切近者君子之脩身齊家造端乎此故孔子錄詩錄正風于始所以勸

也又錄變風于終所以戒也

存諸中莫若忠施于人莫若恕忠是盡已之事為萬事之根天命之性即此而存天下之大本即此而立恕是推已之事揩磨物欲消除私吝使天理流通物我俱得其所也先儒言無忠做不得恕是先有體而後有用也

只正已而已人之從違用舍皆不可必苟以人之從違用舍為累則失其所守必矣

謝顯道言鬼神道有便有道無便無世間無這箇活弄的道理有道無不得無道有不得

尸居龍見淵默雷聲此誠不可揜處王道之本歟

邵子曰思慮未起鬼神莫知蓋思慮未起乃寂然不動萬理咸備之時然此時未有所感鬼神安能知之思慮既發氣便感理便通近而旦夕遠而千萬歲一思卽在近而目前遠而千萬里一思卽到心神感通之妙如此鬼神安得不知鬼神雖知人尚未知蓋人之

知識雖無不通其接物必由乎耳目事迹未著見聞
無所施也人之所接以形鬼神所感以氣人則即其
已形而知其未形鬼神則自其未形通乎已形幽明
不同其理則一也

為政雖使民各得其所物各遂其生方盡為政之道然
其本在於得賢才而用之取人以身故脩身又為得
賢之本未有身不脩而能任賢才者

只從父子君臣夫婦長幼朋友上求道便是真實底道

理

學至於誠身便有獲乎上之理只在所遇如何

誠字大天理之實人心之實人事之實皆在其中忠信則專指乎人而言所以存乎天理之實故孔門以此為學之本

此理貫徹古今無有窮盡在天為天道在人為人道在物為物理學者惟當隨事即物以明其理致其知守於已而勿失謂之忠推於事而曲當謂之恕

思其所當思則心亦不放若不當思而思之則此心牽
纏擾亂乃所謂放心當思慮亂時惕然自省即自整
頓而莊嚴自持則心自湛然在內

致曲是事事要必推行到極處既到極處則誠立矣誠
立則不可揜故形著動變自不能已

成已者必能成物自治者必能治人

先儒言合内外之道又曰表裏交正曰内外交養曰本
末相資曰體用一源顯微無間曰動靜相涵曰敬義

夾持此等處最宜理會此處見得破則知所用力知
所用力則功利無所誘異端不能惑矣

天人之理雖一天人之分則殊故天做天底人做人底
各盡其分而吾之理則天之理也故維天之命於穆
不已乾道變化各正性命是天做天底聖人之心純
亦不已應酬事物各得其所是人做人底夫人即那
天命不已乾道變化中來底吾之性即是那各正性
命底故天命之性盡在于我無毫髮少欠若存得吾

心養得吾性則天命全體渾具于中發而應事各得其所則吾身天道亦流行而無間矣蓋天許多道理我盡有之但盡得吾身之理則天道亦盡令不來吾身做工夫只去思想天道愈見二了豈能合天人之理乎故程子曰天人本一言合天人已剩著一箇合字

聖人心不離乎理理不離乎心所以純亦不已大賢以下必操存省察乃能不離乎理苟不操存不省察則

與理違矣或問聖人心與理一不用操不用省乎曰
聖人固不待操而存省而知然亦無不操無不省但
聖人心無放逸人不見其操誠明徹照人不見其省
所以神妙不測也曰異端亦曰不操而存又曰無適
而非道何也曰異端不事其操只要心空無物既空
而無則不用操矣異端未嘗見道只想像箇道無不
在以爲無適而非道故猖狂妄行常與道離也

天地發育萬物是此理之流行聖人應萬事是此理之

發用學者當隨事省察處之以理可漸到聖人他位
只要熟也

人之才氣大者多疎微者又瑣細致廣大又盡精微方
是聖賢之學

儒者存此心以應物心存則處事當理事得其理則心
益存所謂內外一致心迹不分佛氏只去把持一箇
心不去應事是絕了心之理當事物之來不得已而
應之又要把持照看此心在腔子裡是一邊外面應

事一邊內裡持心應得外面事不曾存得內裡心存得內裡心又不曾應得外面事此其所以內外判隔顛倒猖狂戒謹恐懼小心翼翼工夫無所用一任狂妄高大凌空駕虛而得罪于聖人也昔王介甫言以高明處已以中庸待人便是內外心迹判為二事處已待人分為二理殊不知所謂高明者是不為物欲所累不淪沒其本心中庸是事得其理無過不及也高明所以為中庸中庸即高明之所為豈中庸之外

別有一箇高明將來處已高明之外別有一箇中庸
將去待人

詩言明哲保身不是趨利避害以保其身若趨利避害
以保身非老佛莊列則是奸計小人聖賢道理極明
許多事業都在聖賢身上其出來必與天下俱安道
不可行事幾亦先見若不識事幾走出犯難身亡俱
無所益

智計之人多不能保其身者其智易窮也何以易窮以

非天地間正理也明哲保身是正理非智計也

不愧屋漏雖無一事然萬理森然已具于其中此是體也但未發耳老佛以為空無則本體已絕矣令人只言老佛有體無用吾謂正是其體先絕于內故無用于外也

不愧屋漏便能到得不賞而民勸不怒而民威于鈇鉞
篤恭而天下平

敬只是一箇敬又曰篤敬恭只是一箇恭又曰篤恭是

篤實做得有力不走作也

君子篤恭而天下平君子修身而天下治省多少心機省多少計較伯者費多少智計只補得些罅漏

奏格無言時靡有爭是故君子不賞而民勸不怒而民威于鈇鉞不顯惟德百辟其刑之是故君子篤恭而天下平易曰盥而不薦有孚顒若下觀而化知此則知無為而天下治霸者之功誠小區區才智不足道感應者為治之本所以能感應者理也無聲無臭也卽

所謂一本也故曰聲色之于以化民末也善為治者
脩身以化之明善以教之立政以正之制刑以一之
感化之機雖在無聲無臭處然政刑禮樂既具教化愈
行

學而時習之先要學得真方可時習時習則無間斷而
所學熟矣

程子以盡性至命必本于孝弟蓋孝弟是性命中之事至
親至切而要者此處能精察而力行之則性命不外

是矣窮神知化由通于禮樂禮樂神化只一理禮樂乃人事顯著者然其中精微曲折察而知之神化可契而知之

敬只是常常不敢放肆事事不敢輕為

忠信則不褻人偽所以為學之本須要理會忠信是何事

忠信與誠一也但忠信指人而言誠則合人與理言之主忠信便是實行知識有餘而實行不足無以有諸已

金匱要略卷八
天理至實故忠信便存天理

人有過貴于能悔悔而不改徒悔而已于已何益改過最難須着實做得操存省察工夫使吾身心謹密放僻之心不生則大本堅固過失隨覺而不行也若欲防患于預須以敬為主不使須臾慢忽又常觀書求義浸灌此心悅懌使過失不萌更妙

人作差了事須省察悔悟以速改之不可因循含糊若能省察悔悟以改之則後事尚可少過若不悔改則

終身學不長而過失愈多矣

先王因天理人情而制禮而禮之行又足以正人情善風俗興教化蓋禮樂之體用即聖人之體用聖人之體用即天理之體用

朱子曰無思時要不如死灰有思時不要邪

吳草廬言三十年前好用功阻學者進路居仁三十後工夫方親切張橫渠三十後才遇二程孔子言三十而立則後面工夫更多

人有才氣者老而不見用皆汨沒萎弱不及少年此無
學問充養之功聖賢則老而經歷事多閱理益精操
養益熟故孔子示人以四十不惑五十知天命六十
耳順非若後人聰明才氣之士老不及少也吳草廬
言三十年前好用功亦說殺了惟孔子之言可為萬
世法

學而不思則罔思而不學則殆是要一邊學一邊思習
而察行而著也

聖賢待異端極嚴真如待賊相似孔子曰攻乎異端斯害也已孟子曰能言距楊墨者聖人之徒也程子曰佛氏之言比之楊墨尤為近理故其害為尤甚學者當如淫聲美色以遠之蓋異端害道如莠之亂苗其害大而深功利害道如衆草亂苗其害小而淺

心不安處便不可行故論語言多見闕殆慎行其餘則寡悔

能處貧賤者必能處富貴

君臣父子夫婦長幼朋友以至貴賤賢愚皆有一定之分乃天理之當然故曰天叙天秩有一毫不盡處便是不曾盡得天分有一毫背戾處便是逆天至于死生亦天分也不安于死者亦是不安天分故曰沒吾寧也當貧賤而貧賤亦天分也故曰不以其道得之不去也

人不可徇偏好執已見義之與比

魯子當初做工夫全備一底工夫也到貫底工夫也到

但未悟耳一是大本曾子平日戰戰兢兢盡其忠誠便是立大本處貫是達道隨事窮理禮記曾子問篇精微曲盡便是體用上理會但未知得體用是一原故孔子一喚即悟

仁是天地之生理具于人心者故先儒以為本心之全德蓋兼四德而為萬善之長而統乎萬善者也故孔門之教專在求仁其所以教諸弟子者皆是求仁工夫必至于其心渾然天理無一毫人欲之私乃能當

仁之全體故顏子三月不違其餘則日月至焉

日月至焉亦是到那境界只是不久也

明睿所照作天下事甚容易推測而知便難

非與道為一不能樂故曰知之者不如好之者好之者不如樂之者程子曰非樂不足以語君子

有期待計功之心皆是私心即害于仁故孔子曰仁者先難而後獲孟子曰必有事焉而勿正董子曰正其誼不謀其利明其道不計其功程子曰以敬直內便

不直

學計功所學雖是亦私心私心害仁故先難後獲先事後得為仁

仁者至公而無私故已欲立而立人已欲達而達人先難後獲上義下利正其誼不謀其利明其道不計其功皆無一毫私意智者雖見得真識得到未免起些計度故曰利仁

義理強窮索便有滯礙須涵泳體驗默識而心通之

有理而后有氣有是理必有是氣有是氣必有是理二之
則不是然氣有盡而理無窮理無窮則氣亦生生不
息故天地之闔闢萬物之始終寒暑之消長知道者
默而識之

今之賢者只任他天資見識作事間有窺測些天理來
用只是所見淺終不濟事此由于學不講故也

理氣不相離兵以義起則人心自奮氣自壯雖不可全
用詭計亦須計出萬全故曰臨事而懼好謀而成

周子令程子尋仲尼顏子樂處所樂何事要求見仲尼
顏子人欲淨盡天理渾然處故有此樂朱子恐人只
去望空尋樂不知天理之實必流于異端故又教以
從事博文約禮之誨以至欲罷不能而竭其才令人
不去此處做工夫妄去自己身上尋樂故猖狂不實
自號尋樂子者有之

今人多談怪異以為有者必流于神怪以為無者只是
硬見終不足以解時人之疑故孔子不語怪以此蓋

天地之間所以為造化者陰陽五行之氣而已其交錯變化有正邪常變易險明暗之不齊正而常易而明者理之正人所共知共由故不以為怪邪變險暗世不常有非理之正人皆驚異故以為怪然聖人教人只在正理上窮究正理既明不正者可照見縱未能照亦不可先去窮他只守吾正理而已邪終不能勝正今仙家及巫師做把戲者皆有邪道但君子所不當知也

內有所得不藉于外故富貴貧賤皆不足以動其心以
為君子不欲富貴則逆人情只是以義為主

學者于義理見得分明則貧賤富貴撓不得

容貌辭氣上做工夫便是實學謹獨是要

躬行雖難然當勉若不躬行則無以有諸已言為空言
知為空知何學為哉

古之君子世無道則隱一則道不可行二則亦所以免
禍

人之作事只盡箇當然之道有意必固我便是私意只循其當然之理則意必固我之私可脫脫則無累矣窮理不周遍則不能約要故先博而後約博是零碎處約是總會處窮理而至融會貫通則約矣後世有博學之士不能造約何也此是博雜之學非真能窮理不足貴也

近日學者便要尋滋味快活此皆是未學行先學走如何不猖狂顛倒只當去教他窮理力行見理明力行

正自有滋味自能快活孔子教人去博文便是入滋味處教人約禮便是入快活處但當先難後獲

博文所以明諸心約禮所以有諸已

性情須要養飲酒過醉亦壞性情

井泉出而不竭是氣生生貫通而不窮也理不離乎氣
即此可觀理之不窮川上之嘆以此

見義理不怕見得鈍只怕見得淺雖見得快若不精深
亦不濟事故曰參也竟以魯得之是理會得事理徹

守得牢固

克己又言復禮是從實事上執持使入規矩法度而天理在我非如異端既得之後空虛無據也

此心本與天地萬物同體但為私意所蔽則當致其克復若欲以吾之胸次包括宇宙便成狂妄流于異端顏子克己只就非禮勿視聽言動上做工夫不言氣質之偏物我之私者蓋能如是則氣質之偏物我之私不待克之而自無矣

論語一日克已復禮天下歸仁焉或問顏子克已復禮于天下人何干而天下皆歸其仁曰此正所以相干也物我一理人已一性蓋緣皆自一本中來故血脉相通氣類相應自然而然易曰天下何思何慮天下同歸而殊塗一致而百慮鶴鳴子和皆此意也如此則聖人為治之道可知區區智計之私自不容矣

顏子四勿涵養省察工夫都在裏

孔子言敬只說出門如見大賓使民如承大祭戒謹恐

懼整齊嚴肅主一無適惺惺法收斂身心不容一物
俱在內裡聖人言語如此周徧精切

敬則心之體立恕則心之用行為仁之功莫切于此
古人作事從本上作所以簡要如曰舉直錯諸枉能使枉
者直是甚簡要後人作事無本受多少煩惱費盡力
作事不得

舉爾所知爾所不知人其舍諸聖人舉事動得其要此
簡易之道

治亂興亡美惡邪正詩備矣學者讀之不知所以為政何歟此記誦詞章之學真不足謂之學也

盜賊之生皆因民無恒產與教化不行而致既游手無業又無禮義以維持其心至饑寒所逼鮮不為盜故孔子言庶富教

世亂而無能守之節固可羞世治而無可行之道尤可恥也

齊桓晉文皆以力假仁然齊桓頗近正晉文則全用威

力智計其勤王者反致凌逼力戰屈楚不由仗義然則桓公不能王何也曰桓之事雖正意則私只做得到此分際非有聖賢之學怎能成王業

訂頑立心便可語王道物我之私既去則天地之生意在我推而行之將無一物不得其所不然則雖一匡天下不過出于智計之私况禍敗者乎

為己只把做自己分內事為其所當為久之只見一箇當然底道理其餘都不見矣

學不為己讀萬卷書與己無干為己則皆吾事也

此道理見得明便信得篤存之發行之力方有諸己

有所為皆是私意故張敬夫言為己者無所為而為者也朱子深取之

論舜無為而治一則德盛而民化二則得賢才以任衆職自古為治之道不出乎修德任賢兩事為要

忠信篤敬忠信于進德最力然持養處須用敬也非忠信故不篤篤敬處便是忠信

忠信篤敬實孔門第一等工夫非禮勿視聽言動也靠就這裡做去發處便是仁

忠信篤敬則隨動隨靜心自存理自明

義以制事者義有剛毅果斷之意以之制事則不牽于私意孔子曰見得思義義利不兩立見利須思用義以裁制之不然則必牽于私背于理矣朱子曰義如利刀相似遇着事便劈

詩雖三百篇然人情之邪正風俗之美惡政事之得失

無不備見學者欲擇善而固執之莫切于此故孔子
謂何莫學夫詩程子謂學詩使人長一格價

心無二用只要所趨正窮理明力行篤則心無所放而
仁在其中矣

良知良能本于天德之自然須要養不養則喪滅故古
人自幼便教之洒掃應對孝弟恭敬

論語集註言忠信本也又曰五者以敬為本又曰恭其
本歟皆所以示人用力之方學問根本盡在於此

論語之書涵育薰陶是堯舜氣象孟子七篇任道擴克
乃湯武氣象也

孟子天資本英明剛大他又去集義養氣上做工夫所
以才氣愈剛大

人之學先在持其志志一則動氣如人昏困是氣昏也
若悚然自持則志立而氣自清故持志在敬益嚴肅
之地昏昏不生集義養氣亦由于此

清明剛大之氣須要養如何養只是循天理不為物欲

所屈便是

理不離乎氣氣清明者理亦明氣昏濁者理亦昏氣剛大者承載任荷得道理起氣弱小者便承荷不得氣麗者雖能承載反隔蔽了道理故孟子集義養氣擴前聖所未發程子每稱之

天地間正氣須養養只要直直只是義

配義與道之氣方是浩然之氣是天地間正氣老佛所養一身之私氣

必有事焉此心便無他適乃操存之要窮理之本也
事一差心便愧心一愧氣便餒氣一餒道義便虧此是一
串事只集義便無此病必有事焉是要無間斷

勿忘勿助之間是本心正處天理妙處人欲淨處

人苟能省察使事事合理則學大進矣此即是集義

必有事焉是孟子最善做工夫處人無所事則心悠悠蕩
蕩無歸着必至外馳程子取以明持敬之道其義尤
精孟子雖是說集義亦以見敬為義之體也

程子以必有事焉為敬是發明言外意又可見敬是義之骨子非敬無以集義

必有事焉即主一無適故程子以為敬也朱子以必有事焉為集義因上文而言敬在義中為本也朱子是本文意程子是言外意

孟子知言養氣只是箇知與行致知而至于知止則知言矣力行而至于仰不愧俯不忤則浩然之氣自生言之詖淫邪遁原于心之蔽陷離窮知言由外以知內

也故心學不可不講欲心之正必明理心與理元非二物

孔子賢于堯舜以事功言也孟子功不在禹下亦以事功言也愚以為顏魯思孟之功賢于稷契臯夔程朱之功賢于伊呂孟子以後若非程朱則天下貿貿焉人欲肆天理滅高者入于老佛卑者趨于功利生民之道息矣

天地生人物賴聖人為綜理然後能遂其性得其所聖

人理人物又必賴禮樂政教之施然後風化美治功成然則成天下之功者聖人也成聖人之功者禮樂政教也或曰聖人不得位禮樂政教不可行如何曰此聖人之功所以難成也不得已傳述先王之典而脩明之以垂教于後世使後世之欲脩己而治人者從此而學焉故聖人代天而理物禮樂政教代聖人而行事經籍代聖人而傳道事雖不同其功一也故曰孔子賢于堯舜孟子之功不在禹下

行王道者自脩上要工夫到施為上便不費力伯者雖不用自脩工夫然施為上最費力蓋天下人物本同一理我得此理人自感化我以此理處置他自然順而易伯者自身本無此理人不感化假這道理去處事去制伏他用盡智計方做得成故王道簡易伯道崎嶇學者所宜精擇

王道之外無坦途仁義之外無功利

王者是行其所無事伯者是有所造為

物我一理人之善即己之善舍己從人有何不可人為私意所蔽故偏執己意不能來天下之善

孟子言性善是指本原之理而言程子兼清濁美惡二者皆是也論太極本然之理以為生物之主安有不善論動靜陰陽錯綜交運安得不有清濁美惡之殊知孟子之說則知吾性之本善當求復乎此而堯舜可為也知程子之說則知人不善者乃氣質之偏當變惡為美以致克復之功其有功于聖門有功于後

學非淺也

孟子在本原上看故以性為善荀子在情欲上看故以性為惡韓子在氣質上看故以性有三品楊子見道不明故曰善惡混程朱通兼本原氣質而言斯為明備

性即理也故孟子言性善是也論性不論氣不備故程張兼氣質而言自程子之說出荀楊韓之說不辨而自明故朱子以程子為密

孟子在赤子入井時認取真心推而上之性善可知

張思叔因讀孟子志士不忘在溝壑勇士不忘喪其元有所感遂肯發憤蓋思叔家貧須如此然後貧賤富貴不足以累其心方立得志住死生重于貧富彼死生且不易其志貧富又何足較哉宜乎思叔有所感動奮發也

正道難行如良玉難售大器難用自然之理學者不可以其難行遂變其所守如範我馳驅而不獲詭遇而

得禽豈可因範我不獲而詭遇乎然在末世則然遇
湯武又何難行哉

此理須從優游涵暢中出來則意味自別即孟子所謂
自得之也

國必自伐然後人伐之秦坑儒書肆暴虐任趙高姦邪
是自伐也豈楚漢所能伐哉漢親宦官害忠良是自
敗也又豈曹操所能篡哉唐之敗也亦以宦官害忠
良宋之敗也以小人害君子皆自伐也蓋君子退則

虐政施人民怨盜賊起兵戈興國亡矣

處事之法正已為先順理以行之人之從違不可必也
不可趨時好然順理處天且不違況于人乎故行有
不得皆反求諸已

格君心者須分邪正明義利辨王伯使君心曉然知王
道之當行不安于伯功之小庶可與之有為須賴左
右匡弼使君心常存敬畏方可成其德

人君心正自不肯用邪人此為治之大本故曰一正君

而國定矣

德化為治之本政事為治之具二者交致而風化盛矣
風化盛然後鼓舞羣動薰蒸淪浹仁及一世

天下事要心去處身去行然物各付物則無事矣何謂
物各付物順理處便是

治世以大德不以小惠

事物上皆有理順理而行不容些子計較造作故曰行
其所無事順理則智不鑿而萬事治故曰大智必有

事焉是指學而言不可有造次終食之離勿正心勿助長是亦行其所無事正與助長即私意造作而有事矣豈順理之謂哉

世變難說聖賢多只說得箇大經大法其變易無常處亦說不盡孟子善說世變其曰先聖後聖其揆一也禹稷顏回易地則皆然觀其說一治一亂處甚好但其說不仁者不可以得天下又說匹夫而得天下德必若堯舜禹又曰天子薦之三代前是如此三代以

後多不如此秦晉隋及五代多以不仁而得天下漢高帝德非舜禹亦得天下蓋時勢不同事變不一古者諸侯萬國各固其疆守以愛養其百姓必有君臨天下之德然後能服天下之心必天下共尊然後可得至尊之位苟無其德則列國諸侯之衆非惟不服且將羣集而伐之故不仁者必不得天下匹夫雖有其德無天子之薦亦不得天下自戰國以來天下諸侯消滅將盡七國之中無有能行先王之道者俱以

勢力戰伐相為勝負至于併吞之久惟秦最強然德
不足服人天下莫肯帝秦直至六國消滅已盡秦始
為帝秦又視已之德暴天下未嘗心服若更封建則
尾大難掉乃立郡縣更立守令不使世守疆土世君
其民而易于制使然郡縣無諸侯封疆之固守令無
諸侯世守之權又無君民死社稷之心故秦惡既盈
陳涉以匹夫起兵而郡縣遂不能支四方豪傑莫不
奮起秦之宗社有必滅之理匹夫固有得天下之勢

矣及秦已亡天下英雄雖多然才氣識量無有過于
漢高者則天下之勢固當歸漢故劉季以匹夫而為
天子厥後或以戰爭或以篡奪以不仁而得天下以
匹夫而為天子亦多雖因聖王不作亦由郡縣勢輕
不足以自守也但不仁雖得天下多滅亡不久故聖
人而不得君師之位自孔子始以不仁而得天下自
秦始皇始以匹夫而得天下自漢高帝始

權與經本非二理權者稱錘之名能知輕重而處不失

當經是常法如兩事同至皆當依經而行或不能兼
盡必有一輕一重則當從其重者如兩事皆重則當
詳審而並處之如夫婦人倫重于告禮如告則得娶
得以兩盡是經也告不得娶則廢人倫而重父之過
故不告而娶所以從其重者而處不失當豈不是權
如堯舜得子賢以繼其位此常道也又使其宗廟享
之是兩盡其道然使不肖子居君位必至亡國是誤
天下生民而宗廟亦滅故傳位于賢則生民不失所

朱均亦無後患是以傳子為輕君天下為重也權所以濟經如一兩是一兩如十兩是十兩不失分銖此正天理之精微處非聖賢不能用後世學不及此有以苟且從俗為權者以機變處事為權者故權變權術之學興此是背乎經非所以濟經也

天視自我民視天聽自我民聽只是天人一理豈有得了民心天命不歸者天理即在民心上後世為政者反欲愚其民何哉

古今說義內者惟程子說得精程子曰處物為義又曰
中理在事義在心詳味此言義內之意自見

有理必有氣理所以為氣氣乃理之所為生萬物者氣
理在其中即為性故說着性便遺不得理與氣但所
指不同指其本原所由生之理則有善而無惡故仁
義禮智何嘗不善惻隱羞惡之發無往而不善矣其
為不善是物欲害之也孟子主意是如此然物欲如
何又害聖賢不得衆人如何動輒便為物欲所害是

其氣質不同也故指其本然之理而言則為仁義禮智其善可知指其稟與氣者而言則或清或濁或善或惡不能齊也或問氣何以不齊曰氣常運行交錯無一息之停所以不齊也

仁義禮智乃性之在內者是吾固有本然之善非由外鑠惟當存養之令勿喪存養之久則天性自全本心自明古人自小學洒掃應對事親敬長周旋禮樂習為恭敬無非存養之事程子發明一敬字于學者最

有力而整齊嚴肅是敬下手處或曰整齊嚴肅是外
貌上做工夫主一無適是心地上做工夫曰内外一
致未有外面整齊嚴肅而心不整齊嚴肅者未有心
主乎一而外貌不整齊嚴肅者但當内外交致其功
如顏子之非禮勿視聽言動雖在外即所以養其中
蓋自中而應乎外外不亂則內自有主內有主則外
自整齊此敬之功所以貫内外動靜分而言之則靜
為涵養動為省察統而言之則動與靜皆所以存吾

心養吾德也

仁者本心之全德蓋心中別無他物只是此一箇生理
天地萬物皆不外乎此故孟子曰仁人心也程子曰
心如穀種仁則其生之性也故孔門只說為仁便是
從心地上做工夫仁民愛物從此流出

孟子求放心不是捉得一箇心來存只惕然肅敬心便
在此

心才私便是放不必逐物馳騫然後為放心一放便是

私不待縱情肆欲然後為私這裡最難所以古人戰戰兢兢

朱子曰孟子說求放心煞是說得切細看又說寬了孔子只說居處恭執事敬與人忠出門如見大賓使民如承大祭能如此則此心不容不存此孟子所以不及孔子愚謂中庸言戒慎恐懼程子言莊整齊肅于此用功心自無走作處惟此可補孟子之不及接孔子之教矣

孟子發夜氣之說于學者最有功蓋心也理也氣也一也心存則氣清氣清則理明理明則氣益清氣清則心愈存其要在操存省察于旦晝之間不為物慾所汨顏子之非禮勿視聽言動孟子之集義養氣程子之居敬窮理是工夫

先立乎其大者便是中有主了

今人多惑于怪異是未嘗知性知天夫乾道變化各正性命此外俱是異端他道不必窮也

存其心養其性所以事天吾心之理即是天故程子曰
言合天人已剩着一合字

人之學本於良知良能然全要養養則良知良能日長
不養則日消

孟子在良知良能上體驗故曰性善荀子在情欲交動
處省故曰性惡依孟子說則禮樂教化皆吾性中事
依荀子說是指氣質物欲為真性故以禮樂教化為
偽為也

王道只是公伯道只是私王道一于天理之公一者誠也故其光明正大上下與天地同流而萬物各遂其性伯道假公以濟其私假者偽也費盡智計方能小補于世雖不能無功乃功業之卑者下此則姦雄小人

聖人為政感發天下人心同歸于善如天覆地載萬物並育于其間所以其民皞皞伯者之政是用其私意智力假仁義以收人心故其民驩娛然其所感者私

而狹所為者險而勞是以功烈之卑

孟子言善政得民財是分田制井率天下之民務農重穀以生天下之財而國家亦賴其貢賦非是重斂以得民財又非如王安石用青苗市易以剝取民財大學言生財有大道則財恒足亦此意也

人心全是天理才違理心便不安心便愧忤

莠之亂苗紫之奪朱皆以其相似而難辨與儒道相似莫如禪學此最害道者後之學者做存心工夫不得

其真者多流于禪所謂高者入于空虛蓋天資高邁者多厭世事之汨冗而樂于靜虛又好奇妙而忽卑近又力去做靜中工夫掃除物欲屏絕思慮是在內裡先做空了不覺流于禪學只緣在小學四書近思錄不曾實體驗而于窮理工夫不到故如此

理無不實心無不正謂之誠故荀子以養心莫善于誠周程譏其不識誠誠如五穀已成果實已熟又焉用養孟子言養心莫善于寡欲無欲即誠也心與理為

一也

莠之亂苗非老于農事者不能辨異端害道惟老于聖賢者能知

論語一書堯舜氣象孟子一書三代氣象

學者要得不差須實從小學大學做上去

工夫在大學效驗則見于二南

程子言論語孟子既治則六經可不治而明矣誠哉是言也若論文字則論孟與六經文字體面自殊若論

金
卷八
工夫道理則六經道理不出論孟之外六經工夫作
用亦不出論孟之外所以學者貴自得也先儒以為
推類以通之非也論孟六經之道本一何待推

所謂一本天地人物甚事不是一本孟子言知其性則
知天伏羲仰觀天俯察地近取諸身遠取諸物參驗
錯綜無一毫不合處依此寫奇偶卦畫而天地人物
古今事變盡在其中若非一理只此數畫如何便能
該盡

一各生兩只是陰陽兩端交錯變化自然之妙老氏一
生二二生三是何道理陰陽兩端再參得甚物來作
三故太極生兩儀兩儀生四象四象生八卦八卦生
十六十六生三十二三十二生六十四卦加一倍是
邵子之數愚以為陰陽上各生陰陽奇偶上各生奇
偶此易之理易之理不出於陰陽諸端變化錯綜生
出六十四卦若再錯綜疊上去生得無窮卦出來然
只六十四卦足以該盡事理再疊反過乎煩故卦止

六十四亦自然之理也若天地生物只是陰陽交變錯綜生千生萬無窮無盡又不可限以數目故曰一陰一陽之謂道

陰陽只是一箇消長陽消處即是陰生非是陽去生陰陰消處陽即生非是陰生出陽來陰陽事物到極處便變陽長極了便消消便變陰陰長極了亦消消便變陽亦不是陰變成陽陽變成陰但陰變陽即生陽變陰即生以卦文言之老變而少不變老陽一變便

換出陰來老陰一變即換出陽來凡事物吉凶治亂皆是如此名之曰易

易者變易也隨時變易以從道也是指作易者與用易者言則涉乎人矣若論理則易即道之所為非從道也

在天曰元亨利貞在人曰仁義禮智因天人之分而異其名其理則一也

元為四德之首仁為五性之長蓋天地間只有這箇生

理更有何物元為天之生理仁為人之生理元即仁
仁即元天人未嘗二也

天地人物皆正理所為着邪妄不得故易多言利貞合
正理處則事自治見事皆是正理合正理處人心自
服見人心盡是正理

張子以太和為道體蓋太和是氣萬物所由生故曰保
合太和乃利貞所以為是太和者道也就以太和為
道體誤矣

忠信是進德之基便是立天下之大本

忠信是立誠處所以能進德也忠信二字最力

非禮勿言即是修辭立誠非禮而言即妄也非禮勿言
乃立誠也修辭是修省言辭去其非禮者乃立誠也
天地萬物一理之所為是理處天地且不能違況於人
乎況於鬼神乎

敬以直內是無許多雜亂邪念故內直內直誠便存蓋
人心即有理理本直敬則可以闢防外邪養本性

敬以直內是必有事焉而勿正以敬直內是正也助長也故程子曰以敬直內則反不直

敬以直內是養得仁義禮智之在內不偏不倚故曰中曰大本義以方外是達得惻隱羞惡辭讓是非之情各得其宜故曰和曰達道直內是內裡正當非僻之干無自入矣方外是外面處置得當條理分明各有體面各有準則移易不得

天地萬物只是一箇理順之為難故曰順以動天地如

此况建侯行師乎又曰天地以順動故日月不過而四時不忒聖人以順動故刑罰清而民服後世不知窮理以智力為治所以不能大治

觀盥而不薦有孚顒若彖傳曰下觀而化發明觀之義最切蓋在上者下之觀仰視效上既能盡觀之義在下者安有不觀仰而化乎必以盥薦為言者人之誠敬於此為至盥而不薦不可以詞害義盥則必薦蓋言盥而不薦之時在下者已信而瞻仰之以見觀感

之神速故下文言神道設教也奏格無言時靡有爭
篤恭而天下平無為而治皆此義也

不能謹於始者必當悔於終過此則迷復矣能悔者猶
救得一半秦穆公漢武帝是也終迷者秦政項羽是
也亡無日矣

無妄誠也誠天理之實也聖人只是循其實理之自然
無一毫私意造為故出乎實理無妄之外則為過背
循此實理無妄而行之則吉無不利不幸而災疾之

來亦守此無妄之實理而不足憂卦辭爻辭皆此意
學者則當擇善而固執也

人只當守定實理實理之外不可再有妄動故曰無妄
行有責無攸利

獨立不懼遯世無悶非大過人者不能也此時當如此
損上益下曰益損下益上曰損周禮泉府買貨之滯於
民者欲有益於民也王安石行市易法青苗錢是欲
益上損下也故周公行益道安石行損道

天下只是箇公與私義與利而所為所成迥別天地革而四時成與湯武革命皆是至公義所當革如春革冬非春要革冬乃天地之氣自然而然夏革春秋革夏皆然如湯革夏命武革殷命皆是理勢之自然非有心於得天下若有心謀天下便是私而不義湯武只是存天理以治國愛民及德盛民歸自不容已而桀紂之惡日甚天下之民皆引領望之救已戴之為君湯武亦不得徇私逆理違天拂民而不救也桀紂

失君道天命已去湯武盡君道不得不奉天命以伐之既誅桀紂則天下之人固不肯舍湯武而別求君湯武亦不當舍天下而不為君此如四時之革理勢氣數之自然非有心於革也如秦革周漢革秦唐革隋皆有心謀奪其位非天命所當然或曰周秦隋皆天命已絕何謂不當革曰周秦隋天命雖絕而高祖太宗亦以私意取之非理勢自然之革況始皇之暴乎必如天地四時之無私乃革道之至也或謂武王

伐紂旣無心謀天下當擇商之賢子孫如微子箕子者而立為天子自居諸侯之位豈不可乎曰此亦私也夫天下者天下之天下商豈得而專有之若使一家可以專有之則肆淫虐而無害也以理論之當以首出庶物者為君次者為臣下者為民君所以總理民物臣所以分任庶職民則受治而安生若肆暴虐則君道失臣民無主自當歸於有德況周之德盛民歸又伐暴救民天下之人豈肯釋周故孔子以天理

四時之革同乎湯武之革一循乎理無一毫人欲之私也

人性本善循理而行本不難非但自己不難施之於人亦順而治此乾坤簡易之理

吉凶者得失之象也凡天下之事得其理則吉失其理則凶六十四卦三百八十四爻皆然雖否困蹇剝之時苟處之有道在我亦有吉亨之理如六爻中正者未嘗不吉不中正者未嘗不凶

吉凶禍福不在此理之外故易可以知吉凶

精氣為物游魂為變此說得人鬼死生最明

範圍天地之化而不過曲成萬物而不遺此聖人做天
底事鼓萬物而不與聖人同憂天之作用又與聖人
不同

晝夜者死生之道也晝是息夜是消晝是伸夜是屈晝
是始夜是終不是將消者再來做息屈者再來作伸
晝則必夜夜則必晝是自然之理昨日晝夜自是昨

日底晝夜今日晝夜自是今日底晝夜不是將昨日晝夜來作今日晝夜是昨日晝夜盡了今日晝夜再生造化不窮往者過來者續舊者滅新者生自然而然死生便是此理精氣為物物便生是聚也始也游魂為變物便死是散也終也造化自能聚散自能始終豈將既往之聚散來作新來之聚散將既往之始終來作新來之始終如寒來暑往是寒極必暑暑極必寒亦不是將去年寒暑來作今年寒暑是今年新

金方氏卷八
卷八
生底寒暑故歸根返元死生輪迴之說是不識造化也

一陰一陽之謂道繼之者善成之者性繼那天道便是善成那善便是性以此知性善無疑性惡者蔽於氣也氣從何出亦理之所為故程子又曰善惡皆天理但人自不可流於惡又曰不是善惡在性中相對而生既曰不可流於惡不是在性中相對而生則元初只是善也

朱子曰易有交易變易之義交易者陰陽之相感變易者陰陽之相推相感者固相生相推者亦相生故生
生之謂易

天地設位而易行乎其中只是敬也敬則扶得道理在
善則千里之外應之不善則千里之外違之此可見感
應之理如曰不賞而民勸不怒而民威於鈇鉞篤恭
而天下平聲色之於以化民末也觀盥而不薦有孚
顒若下觀而化也上老老而民興孝上長長而民興

弟天下何思何慮天下同歸而殊途一致而百慮虛
中無我有感必通誠能動物一日克己復禮天下歸
仁焉此明感化之機不動聲氣蓋在無聲無臭處其
原是一本此無為而天下治其要在謹獨

退藏於密只是其心湛然無事而衆理具在也

易曰齋戒以神明其德程子主一無適是齋子思戒慎
恐懼是戒合而言之敬也

天下之理雖萬殊而實一本皆具于心故感而遂通若

原不曾具得此理如何通得

一闢一闢謂之變雖變亦是常理故曰中庸

太極理也道理最大無以復加故曰太極凡事到理上便是極了再改移不得太是尊大之意極是至當無以加也

太極者理也陰陽者氣也動靜者理氣之妙運也

有是理必有是氣故有太極便生兩儀有是氣必具是理故兩儀既判太極即具於其中故曰一物一太極

又曰萬物共一太極

理是氣之主氣是理之具二者原不相離故曰二之則不是

一各生兩一物中便有兩儀是易中自然之數畫卦者因之若天地生物無非兩之所為所生之物其數不拘於此絪縕交錯多寡不齊也

朱子謂易為卜筮而作恐不然易是摹寫天地間變化河出圖聖人則之是則其陰陽奇耦之數河圖亦因

卜筮而出乎伏羲仰觀天文俯察地理遠取諸物近
取諸身參驗得無不是此箇道理故畫出卦畫以示
人既畫之後則陰陽消長吉凶悔吝無不在其中故
因用之以筮占吉凶

形而上者謂之道形而下者謂之器陰陽形而下之器
也陰陽之理道也故曰一陰一陽之謂道人之動作
威儀形而下者也其理則形而上者聖人制而行之
謂之禮施之天下謂之法習矣而不察行之而不著

是不能由器以察理故曰終身由之不知其道

生物須要陰陽交感乃生或以氣交或以形交天地氤
氲萬物化醇是氣交男女構精萬物化生是形交

血氣盛則生子子長則父母衰此即易也變易之大者
古人以陽為善陰為惡陽為君子陰為小人此以類而
言也若論一陰一陽之謂道豈可以陰為惡以類而
言則陽剛健陰柔弱陽清明陰濁暗非善惡而何

程子言善惡皆天理非言有不善之天理言善惡皆天

理中出來的是理處便是善非理處便是惡蓋太極流行便有動靜陰陽是非邪正亦是理之自然不能無者非言惡者亦可名為天理也

扶陽抑陰雖聖人之用意實天理之當然蓋聖人之意即天理所在非如人之私意

聖人只是盡其道感化之妙自然而然聖人固欲人之感化亦未嘗有心也故曰同歸殊塗一致百慮只虛中無我而已

易之道廣大悉備程子以事理明之朱子又多以象占推之皆可蓋一陰一陽之謂道其交錯變化高下清濁偏正美惡無所不有故六十四卦中象占無不備事理無不該既不可專拘於事理亦不可專拘於象占也然事理又切世用

立天之道曰陰與陽陰陽氣也理在其中立地之道曰柔與剛剛柔質也因氣以成立人之道曰仁與義仁義理也具于氣質之內三者分殊而理一

立人之道曰仁與義人不仁義則人道絕矣今人處事不存天理只用智計便虧却人道

一物之中便有兩儀陽中有陰陽陰中亦有陰陽如天本屬陽又曰立天之道曰陰與陽地本屬陰又曰立地之道曰柔與剛豈不是一各含兩之義如邵子加一倍法是易數之本五行雖是五除了土作冲氣又只成四箇四箇又只成兩箇陰陽水是太陰火是太陽木是少陽金是少陰冲氣是陰陽會處會則和矣

故土居中天下無一物無陰陽火雖屬陽亦有陽火
陰火丙丁是也水雖屬陰亦有陽水陰水壬癸是也
餘皆然以動靜言之動屬陽靜屬陰以始終言之始
為陽終為陰以先後言之先為陽後為陰以方所言
之東為陽西為陰以屈伸言之屈為陰伸為陽大而
開闢小而呼吸程子言無無對者相對處便是陰陽
只有太極無對太極含得有動靜之理在內中自有
對也凡事前一截屬陽後一截屬陰凡物頭屬陽尾

屬陰上屬陽下屬陰左屬陽右屬陰

窮理盡性以至於命程張所論不同朱子于或問論之
詳矣然亦是各據自己分上說程子得之易故其言
快張子得之難故其言由經歷次序上說

名卦之義與卦之彖辭本難曉然孔子彖傳說得已自
分明善讀者沉潛玩味則卦義卦辭皆可得矣

程子易傳多主事理朱子本義多主象占然有是事則
有是理有是理則有是象有是占亦非有二也若專

主本義則似乎太拘必讀程傳方發明得盡

以易為卜筮之書固不足以盡易以為非卜筮之書亦不可蓋易是精微之書造化人事無不在內故以之卜筮則知吉凶以之處事則無悔吝蓋文明始開即生伏羲文字未立先畫卦爻故此書雖聖人所作實則天開觀龍馬負圖可見伏羲仰觀俯察遠取近取圖中奇偶與天地間造化事物無不契合乃畫八卦因而重之以盡天下古今之變以之卜筮足以知

吉凶蓋卜筮事變只一理相通而應無異術故聖人
用之卜筮為多孔子發明之後天理人事顯然為學
本末廢興存亡進退出處莫不詳盡自程子作傳多
歸于人事而天道著明易道至此無餘蘊矣

天下之變無窮惟易可以盡之蓋易陰陽奇偶變易無
窮若天地之闔闢氣運之盛衰日月之更迭寒暑之
往來陰陽之消長人物之死生國家之興亡世道之
古今其消息盈虛升降屈伸吉凶消長進退存亡幽

明終始善惡邪正皆是此理雖萬變無窮易足以盡之蓋易自造化中寫出來故也其餘諸經或因時制作隨時記錄天理人事無不詳盡所以垂世立教無不精切但天下古今之變惟易能盡也

本義多本象傳

讀易者當先觀彖辭象傳次讀程朱傳義以發明之爻亦然程傳又有發明到象傳爻象外意者學者所當體也

文王在羑里演易周公又繫爻辭是欲以此盡天下古今之變以為專為卜筮恐不可

卦之六爻以中正為善又必有正應方可有為蓋中正則才德不偏有正應則君臣相遇誠意相孚方可以成天下之治

康節言畫前有易此說最精未畫卦之前卦之理已有但非聖人寫不出來禮樂亦然制禮作樂雖出於聖人未制作之前禮樂之理已具特假聖人之手以成

如曰天地設位而易行乎其中天高地下萬物散殊而禮制行矣流而不息合同而化而樂興焉皆此意也刪後無詩却說不定如有聖王者作其詩固在也觀堯典見得聖人作事只是公天下之心無一毫私意今人有過去思慮以為心不放者有常拘制着住心在這裡以為存者皆非聖賢存心之法所以流於異學聖賢只說戒慎恐懼則心自存何嘗着住此心不許他走只整齊嚴肅則心便一何嘗過絕思慮以求不

雜主一只是常要整肅非是尋得箇物事來照管不失堯曰欽明只欽則本心自明亦不是要見得此心光明如一物在此儒釋之分正在此處宜深察明辨也

聖人之道大行薰蒸漸染得人皆去為善所謂黎民於變時雍是也

君相之職最難者是知人四凶在堯時堯照見他心術毫髮不隱如共工則曰靜言庸違象共滔天於鯀則

曰咈哉方命圯族但當時舜禹稷契等未出鯀之才
高可用故只得用之曰往欽哉戒之甚切馭之甚嚴
然亦用之治外事而已不使之預朝政也非聖人不
能如此處置非聖人照臨在上亦用四凶不得如荀
或不識曹操孔明誤信馬謖溫公不知邢恕劉元城
不知程子定夫胡文定不知秦檜皆是大本有欠燭
理不明故也是以君子大居敬而貴窮理

闢四門明四目達四聰此舜為治手段後世所當法也

然搜揚賢才而用之則四門闢矣得賢明忠直之士而寄以耳目廣詢博訪以來直言極諫則四聰達四目明矣

金人不以布帛換金銀是他有見識

皇極訓大中雖不甚害理終不親切惟朱子訓皇為君訓極為至極之義標準之名然後見人君以一身為天下法王道根本在於此此義至精至切得箕子之旨矣

古人做工夫極切實貌曰恭言曰從視曰明聽曰聰思曰睿非禮勿視非禮勿聽非禮勿言非禮勿動

敬是箇扶持身心的物事怠惰是箇喪敗身心的物事故曰敬勝怠者吉怠勝敬者滅

聖人在上氣勢大風化盛人之善心自長惡心自消觀二南之詩可見

詩之所以能興起人心之善者以人情事理所在又有音韻以便人之歌詠吟哦吟咏之久人之心自然歆

動和暢

他山之石可以攻玉者以其能生吾戒懼之心也戒懼則德成惰慢則德喪

浮議雖不足惜亦可以恐懼修省是他山之石可以攻玉也

冬之夜夏之日百歲之後歸於其室此人之至情上之人讀是詩亦可知自省矣

作事雖要人才然人才一半是天生出來一半是聖人

作興出來如伊傳周召是天生出來如曰豈弟君子
遐不作人濟濟多士文王以寧是聖人在位作興出
來

雖雖在宮肅肅在廟不顯亦臨無數亦保此聖人之敬
也

詩曰旣破我斧又缺我斨周公東征四國是皇哀我人
斯亦孔之將見得聖人為國為民之心至誠真切無
一毫自利之心故六軍之士感戴誠服而心化非但

勞而不怨又以周公為哀已而為之感謝之無已也
有太極便有陰陽有陰陽便有天地有天地便有人物
有人物便有性情有性情則形於言語詠歌自不容
已此詩之所以作也詩既作又足以正性情辨得失
興教化感人心動天地格鬼神此詩之本末功用也
詩之善者讀之此心有所感發興起詩之不善者讀之
此心有所懲創羞惡此方謂之善讀詩

治世之詩言其君上憫恤之情亂世之詩錄其室家怨

金匱要略卷八
思之苦范氏此說甚好

元年春王正月此六字聖人書法是如此或孔子所書
或舊史所書皆可王字必聖人所加元年者魯君之
首年不稱首年初年一年始年而稱元年者元有大
始之義古有元祀元日則古人已是如此稱只是一
箇理當理處便是聖人書法春王正月程傳備矣

春秋之時王道絕矣聖人作經以明王道王道即天理
也因亂世之事裁以天理如當時諸侯不王必書王

正月以正之周王不天必書天王以正之此皆立萬世之法不但為當世而作也

春秋不與五霸者是他心術不正事事把私心去做那些仁義是假底或曰齊桓晉文若以真心去行仁義春秋亦與之乎曰他若以真心行仁義即王道也春秋不必作矣他本無明理正心之學故謂之假仁曰設使聖人為之如何曰聖心正已而物格尊王室正侯度明理義興教化

盟以結信先王雖不禁必竟是忠信不足乃如此然必行會同之禮以釋疑崇信猶是去私就公尚可也春秋之時則要質鬼神以行其私又且動輒歆盟是屢盟長亂非但人情衰薄又褻慢鬼神故春秋書之以示貶則信義重而王化成矣

祭伯來當從程傳當時諸侯不朝王祭伯為王卿士若輔王修德行政誰敢不庭顧乃自甘衰替下朝諸侯書曰祭伯來苟且無聊甚矣王與祭伯俱失道也

程子言諸侯不可越國迎婦止當親迎於館是或一道
禮不曾載天子諸侯婚禮無可考孟子亦曰諸侯之
禮未嘗學詩曰韓侯迎止於蹶之里似諸侯越國親
迎也故文定引以為証

平者釋其宿昔怨仇之意聖人非不欲其釋怨欲其結
仇也但春秋之時諸侯釋舊憾輸新好皆是私意屑
屑非公平正大之體其怨也乃私怨其釋也乃私釋
其于處已睦隣皆失其道若一循天理則於人又何

怨仇之有不得已而有之亦怨所當怨不待平而吾心未嘗不泰然矣此春秋之意也

春秋以正大天理觀之則見王道不行當時諸侯皆是營營於私意或當為而不為或不當為而為之或昏弱而不振或恃強以為暴或怠惰而不知修省或僭逆而無狀聖人之意蓋欲一歸天理之正而後已其於天地生物之心保民救時之意生殺與奪之權隱然見於書法之中實為百王經世之大法或者乃欲

計區區霸業之盛衰又以姓名日月爵號為誅賞其
穿鑿瑣碎甚矣

春秋凡書弑者其罪必誅而不赦也其被弑者昏惑不
君可知矣書殺賊者幸其能討賊也不書者罪當國
臣子不能討賊也內不書弑者不忍言也不忍言則
惡極當誅可見矣此聖人言外意也不地所以著其
實之不可掩也賊不討不書弑者罪臣子無為也賊
在則喪禮廢而不成葬矣此法明則忠孝全人道立

紀侯大去其國以非齊之罪恐非伊川之言紀侯微弱不能守國固不為無罪然比之昏暴以致滅亡者有間非逼于強暴必不去也則齊襄之惡著矣

春秋以受伐受戰者為主故書及以責之夫國必自伐而后人伐之是既失為國之道矣今又不能持重自守固國保民明辨曲直以却敵人之師乃僥倖一勝而遽與之戰非已亂之道也幸而一勝則結怨生亂不幸而敗則宗社危矣

讀春秋使人自然戒懼不敢萌一毫私意

讀春秋便見得君是君臣是臣父是父子是子長是長幼是幼夫婦朋友截然分明而各止其所其於天道人事分殊理一無不明備此聖人手段

春秋天理之準的使孔子得行其道必參酌百王之法大備典制為萬世準則道既不行故寓二百四十二年行事於魯史中乃天理之準的也

春秋乃孔子之行事因當世之事一處置從天理上去

堯舜三代之道具見於此其斟酌權衡以定百王之
法先儒傳註多穿鑿瑣細惟孟子程子得其本原大
意朱子謂以形而下者說那形而上者去蓋孟子程
子朱子之學具聖人之全體故深得聖人作用默契
聖人心事非若諸儒但推測億度也

古今說春秋者惟孟子程子精切深得聖人作經之意
蓋其學隣於聖人故能得聖人心事其曰春秋天子
之事曰春秋經世之大法古今作傳者亦惟程子第

一胡傳雖祖程子不及程子簡當發明有力故春秋當以程傳為主以胡傳及諸儒之說以輔翼之則聖人正大精微之意不中不遠矣

春秋即人事以明天理用天理以處人事

非胸中有王道不能註春秋下此皆杜撰臆度也

左氏傳博洽記載當時行事及言論煞有是處其陋處好以成敗禍福論人

作春秋傳者不少惟程子傳發明得到胡文定既學於

謝顯道不應不取程子傳而自作傳雖有祖程子者不當不表程子而以為已說也

胡氏春秋傳多穿鑿只得他議論發越然緊要道理亦不發到

記曰君子莊敬日強安肆日偷學者脚步正在此立程子曰毋不敬可以對越上帝

四書六經之理意皆相貫通先聖後聖其揆一也今讀其書不實究其理徒誦其文義則四書六經文字各

是一般體面千頭萬緒雖皓首亦無如之何矣惟察其理而實體之於身則體用一貫又何難哉程子所謂論孟既治六經可不治而明誠哉言也

四書六經之言廣大浩博精密後世無人理會得至程朱方理會得今因程朱之書以理會四書六經如指諸掌只是人不立志不反之於身所以無柰何

三皇之書謂之三墳言大道也既言大道孔子不當刪去孔氏言懼覽者之不一既言大道豈有不乎程

子言後人稱述當時失其義理者既失義理周公必
不令外史掌之蔡氏謂簡編脫落不可通曉亦不應
盡脫落雖或脫落存其明白者亦無害竊意三皇之
時風氣初開大中至正之道未盡明或過於渾淪或
過於樸素簡靜非後世所宜者周公之時禮樂政教
方極明備存之無益後世為害必矣孔子欲為萬世
立法故去之程子謂上古雖有文字制立法度為治
有跡自堯舜始斯言得之

居業錄卷八

居業錄跋

夫學者將以適於用也自聖學失真卑者溺於功利高者涉於玄虛其所論著非不侈然仁義性命之談然其行不掩總之無當於用安所稱實學哉國朝理學若河東薛氏餘干胡氏兩先生者剴志聖賢之道粹然一出於正學問宗旨大較符合說者謂河東致位館閣立朝事業彰明較著餘干一布衣耳終其身讀書講學無所表見於天下天下亦私竊疑之謂漫衍未効孰與功見

言信噫是非知先生之學者先生之學身心內外一主
於敬自夫婦居室之近以至於應接事物進退古今確
然有不可易之見淵然有不可窮之用嘗自勵曰誠敬
既立本心自存力行既久全體皆仁舉而措之家齊國
治聖賢之能事畢矣此實先生身有之故言之親切而
有味也堯舜之道巍然煥然不過起於兢業一心謂敬
為齋居默坐有體無用者舛矣蓋修己此敬安人安百
姓此敬第得時行道則為敬事羣居類聚則為敬業耳

藉令畧本體而惟功業之程則九合一匡非不焜耀一時何曾西深鄙之不屑與同日語哉彼其闇於聖賢大學之道即建樹鏗錡終涉粗迹無標之影無源之流君子何取焉先生敦本尚實誠有用之學與河東易地皆然惜也不獲一試其志誠可悲已居業錄舊有刻歲久字板漶漫中丞李公學宗正脉以興起斯文為已任於先生之學有深契焉大懼曲學亂真而是書不傳也以余生近先生之居亟命訂之因求遺本補正遂為完書

刻成綴數語於末簡萬厯壬辰鄱陽陳文衡跋

